

ACTO CONMEMORATIVO NA CAS DI BETICO CROES

ORANJESTAD (AAN): Dia 25 di Januari, fecha natal di e Libertador di Aruba, Sr. Betico Croes (q.e.p.d.), a tuma lugar un acto conmemorativo na e cas Sta. Cruz 124, e hogar na unda nos lider inolvidable Libertador Betico Croes, a lanta y haya su educacion, pa despues bira un di e estadistanan mas grandi cu hamas Aruba por a conoce. Mr. Nilo Croes, den su introduccion a trece dilanti cu ta trata di un iniciativa particular na unda cu conciudadanonan particular a funda un Comision cu 1x vez pa aña, lo bai rindi homenahe y recorda tur

hecho of cosnan cu tabata tin di haber cu bida, carrera y logronan di e gran persona, en feliz memoria, Libertador Betico Croes.

Dia 25 di Januari 1995, tabata net 57 aña pasa cu Betico a nace y ta na e cas Sta. Cruz 124 ela crece bira grandi, haya su formacion positivo, por a unifica e pueblo y logra e anhelo cu mas tabata den su curazon, e STATUS APARTE pa Aruba. Un gran parti di su bida el a pasa den e cas na Sta. Cruz 124.

Ta conoci cu el a hiba un lucha tenaz y sin cu e tabata tin descanso el a bai dilanti y hiba e causa na un final

victorioso. Betico a wordo reconoci como e Tata di e nacion Aruba, como e politico di mas grandi cu Aruba a produci, e persona cu a logra pa nos e anhelo di tur tempo, e libertad, e Status Aparte.

Un otro miembro di e Comision Ir. Cornelius Wilson tambe a hiba palabra y elabora ariba e proposito y metanan di e Comision. Tur aña, ariba e fecha natal di Betico, mester recorda concretamente kico Betico tabata nifica pa e pueblo Arubano y ta pesey e iniciativa aki, Sr. Wilson a remarca. Ela bisa tambe cu e



Comision ta desea di funcionar fuera di e esfera politico.

Seguidamente, Sr. Francisco "Don Pancho" Croes, tata di Betico, den presencia di sra. Mimita Croes, mama di Betico, rumannan y invitadonan a haci e acto di develo, kitando e bandera di Aruba for di e plakaat. Sr. Croes tabata sumamente contento cu e iniciativa di e Comision y el a remarca cu ojala tin mas iniciativanan asina pa nunca nos lubida locual Betico a haci pa Aruba. El a gradici e Comision pa su bon trabao. Finalmente Sr. Rudy Croes,

den nomber di familia Croes, a elabora ariba e trayectoria di Betico, como un persona, Betico como e educador, como cristian, como e deportista, den actividadnan social y por ultimo como e gran politico. Betico a logra unifica e pueblo, y ta di tal manera el a logra cu Aruba a haya su Status Aparte, sr. Rudy Croes a remarca. El a gradici e Comision cu e iniciativa aki.

E acto di conmemoracion a wordo clausura cu un toast di champanja, y na unda cu e presentenan a celebra e acto conmemorativo.